

【國家社會科學基金重大項目（11&ZD119）】

中國人民大學佛教與宗教學理論研究所

何建明 主編

中國地方志
佛道教文獻匯纂

寺觀卷

（204）



國家圖書館出版社

中國地方志佛道教文獻匯纂·寺觀卷
福建省 泉州市

南安縣志

蘇鏡潭纂修

民國間泉州泉山書社鉛印本

南安縣志卷之二

輿地志之二

山

九日山在縣西三里屬一都邑人以重九日登高於此或謂有道人言吾自戴雲山來此九日迺到故名溪流演漾峯巒映發自東晉以來縉紳先生以及方外之侶並從探憩至唐秦系棲隱於此時有松樹千章蓋東晉時物鬱然幽閤後僅存其一虬蟠可愛遊茲山者必婆娑其下焉清順治間大風斯拔亦志變也茲山既多奇蔚加以唐姜公輔韋僊先後寄寓遂爲名勝宋則士大夫餞送雅集於此紹興丙子朱文公尉同秩滿就宿此山傳自得載酒幘被

泛舟弄月劇飲放歌時文公方二十七歲迨後三十年爲淳熙乙巳文公請祠家居復來重遊與陳休齋知柔賦詩懷古復書九日山三字鐫於石而茲山益重姜公輔所居在九日山左公輔爲唐德宗相謫官來泉居此慶曆四年蘇紳大書姜相峯三字於石峯頂有磴可坐十數人宋人有姜相臺詩公輔歿遂葬焉秦系所居在九日山古系爲唐憲宗時校書郎來隱於此後東去秣陵邑人爲立亭曰秦君亭號其峯曰高士石刻篆書高士峯三字蒼勁古質蘇才翁筆也亭旁因石爲爐碾盆硯故蹟具在山麓有寺曰延福晉太康中所創去山二里許唐大曆三年移建今所寺額歐陽四門所書也大中五年賜名建造寺宋乾德中陳洪進增建乃改

今名〔閩書〕山故有三十六奇一曰神運殿唐咸通中僧初建殿取材於永春之樂山遇一叟爲之導是夕又夢許護送旣一日江水暴漲其筏自至若神運然故以名一曰靈樂祠謂指木之叟蓋樂山之神爲祠以祀之水旱疫癘海舶祈風輒見徵應宋時累封通遠王賜廟額昭惠其後迭加至善利廣福顯濟一曰肉身王姓陳名益熙寧間有西夏之警詔求勇敢士郡守辟益爲巡轄官元豐間觀廟之靈誓捨身爲佐遂植杖立化僧尼爲益軀別祠奉之淳祐中累封仁福王一曰檀樾林〔閩書〕昔殿宇甫成夜有神人擁徒歷觀俄隱於林間每遇陰雨其中有燈自明一曰菩薩坑一曰仙人橋一曰石佛岩陳洪進因山石鑄佛焉故名朱文公有題

石佛岩詩一曰東峯道場一曰秦君亭一曰姜相臺一曰無等巖
石高丈餘上刻泉南佛國四字無等唐時禪師也一曰水陸堂一
曰放生池通遠王在宋最爲靈著州人祈禱翕赫酒肉滂沱及乎
散胙飲福觴豆雜進喧呼紛藉山僧慧邃曰五教殺爲大戒神實
依佛其有不從卜於神曰其誠易殺爲仁却葷茹爲蔬食則兆吉
慧邃曰神許我哉於是作水陸堂放生池歲救物命不知凡幾李
邴爲之記一曰御書閣以藏勅書一曰墨妙堂堂在奉先院中以
東壁有蔡忠惠詩故名詩入藝文一曰亂峯軒亦無等所建一曰
聚秀閣一曰廓然亭亭在山半宋元豐間天台可師建朱文公有
詩一曰思古臺臺在山阿文公書亭扁曰仰高蓋景行姜秦二公

之意一曰一眺石在石佛前古榕間有石如盤廣丈餘登此石長
江疊嶂一覽千里左鑄一眺石三字右鑄與木石居四字一曰釣
臺一曰翻經石梁普通中梵僧拘羅那佗翻譯金剛經於此一曰
碧玉峽兩石並立在山之陽張思有詩一曰小清涼石一曰石龜
一曰石碾一曰石盆一曰石硯皆在秦君亭側秦隱君遺物也一
曰自然礫殿西有石如礎自然天立當時因以架柱一曰白雲井
在北峯之南唐進士傅荀寄褐於茲旭旦汲水見雲霞井覆上波
湧其中有龍躍起又名釣龍井一曰惠泉一曰翠光亭亭在寺前
天光雲影上下輝映一曰晉朝松偃蹇蟠屈異於常木或天陰雨
有龍擾其上一曰無名木宋時木也而莫識其名王龜齡有詩元

施德鑄無名木三字於石一曰醉席在高士峯有地一區其草如茵可以醉客又有明孔仙希島墳在元王麟石刻如此江山四字之下一曰百級石繇此級達石佛岩岩後復有菩薩泉泉出盤石中奔湍漱響聲比絲竹今諸奇俱廢雖有存者亦復零落不堪入眸矣宋有陳忠肅瓊讀書山房明有黃養蒙半山別墅亦僅存故址過其下者徒深景仰之懷後君子有能興之者乎要亦非復舊時觀也

蓮花峯在縣西北二里屬一都名〔勝志〕巔開八石若蓮花然左壁有宋熙寧中邑人戴忱詩刻於石宋元豐中有真覺禪師戒行精嚴從之者數百人建有蓮花臺元祐中藏有聖衲袈裝金環條鈎

著作佐郎黃廷堅爲作蓮花臺銘朱文公陳知柔俱有詩刻於石
明正德元年春禱雨於石蓮之巔有應邑人伐石構亭取戴忱一
蓮花不老之句名曰不老亭黃河清爲記旁有巨石扣其聲如鐘
如鼓亦一奇也亭後有孤松蟠根石上四時葱鬱如蓋萬曆間構
樓於石亭之左下建文公休齋書室西行數百步傳履約瓶爲奇
石室爲石門鐫傳巖二字傅夏器爲記今石亭猶存而樓已圯僧
再建禪房於亭左雅有可觀

圭峯山在縣西南三里屬一都上有靜觀窩鄭維嶽構亭其中莊際
昌題鄭孩如先生讀易處八字刻於石下有報親寺寺久廢明萬
曆中復興會元傅夏器嘗居於此手植諸果自給崇禎中邑人周

維京與其子廷龍捐資重新之

錦田山在縣西四里屬一都五代時張清溪居此爲顯官晝錦歸號其山爲錦田明傅夏器故里有錦荔下有田萬頃上有大福寺詳見寺觀

葵山在縣北六七里屬三都自雙陽山東北來山有疊石如筵號疊經石又似葵花然宋時上有法華院下有三華院唐翰林承旨韓偓威武軍節度招討使傅實宋左丞王安中邕州守蘇緘皆葬在此山山西南行數里爲九峯爲蓮花峯爲獅子山中落轉入武榮

而縣治在焉

九峯山在縣西北四里屬三都山凡九峯峯頂有岩曰西華宋郡守謝埴勒西華九峯四字於石又有真一泉三大字蓋取蘇子瞻乳泉賦語有嶺爲進士王良柱所開闢泉州路由此通故名九峯嶺良柱亦自號九峯現嶺路有南無寺

龍山亦名雙獅山在縣東四里屬三都上有龍山岩下有慈民院山

勢如龍偃而復起者九亦曰九躍山連絡翠屏靈秀佛跡諸山前
後古跡曰廣福曰慈恩曰資慶曰長興曰龍興今皆廢

佛跡山在縣東南四里屬三都唐光啓中夜常現祥光王廷彬使視
之見山石有巨人跡因名山有佛跡寺今廢又有挺贊省權棲岑
三禪師塔

翠屏山在縣東南七八里屬三都山形爲御屏土星有豐隆鎮重之
象俗名國山亦取其形也下有福清寺

右諸山皆翼邑治之東西南北

玉枕山在縣北二十里屬四都遠望如枕高插雲霄雙陽山由此出
下有清水岩唐東林寺故址也唐黃滔有詩

明心山在縣北三十里屬五都與十八九都聯界舊志作六七都誤其山高大明秀上有明心寺祈雨甚靈有四泉亭邑人黃河清爲記又有猛虎山爲泉永往來必經之地

玳瑁山一名大帽小帽在縣北三十里屬六七都中有靈應巖一名紫帽巖唐有李道人修真顯化其上有祈雨崙卽道人著靈處手植竹至今叢茂巖自明黃誼菴黃應生建順治庚子邑人黃啓漸重修道光間黃心存復修巖旁有朝天石黃允肅立碑於此

建興山在縣北三十里舊有建興寺又有碧石嶺有香嶺有尖坪皆勝概也

高蓋山在縣北七十里屬十一都山頂方平似蓋故名高蓋唐歐陽詹生長於斯以詩聲於世故亦名詩山下有村曰詩村溪曰詩溪皆以詹重也山饒紫色多奇石生佳茗香薷黃菊百合諸品閩山多生斷腸草詩山不生清淑之氣所獨萃也〔明一統志〕據舊傳謂詹有哀母詩方伯戴廷詔歐陽攷既辨析爲永福高蓋山陳嵩

詩以證其訛茲可勿贅〔高蓋奇書〕山有四景十二奇四景一白雲室陡起三台形似筆架巖讀書於斯廷詔亦肄業於斯今詩山校之案山一秀峯岩列屏爲砦砦下岩宇寬敞此在山之陽也一資福院憑山爲院地極幽敞唐碑記咸亨辛未曹溪惟節禪師遊於此樂其山川佳麗有歐陽公揮金爲構院宇額曰資福俗名高蓋巖中有古檜唐時所植一萬壽巖昔人建此以祝萬壽今移其巖於劉林鄉而仍其號有神曰興福王世著靈響此在山之陰也十二奇一歐陽墳盤於絕頂自白雲室透邈而南而東北起小巒頭於西奇石巉巖巖層祖母葬其間號翻龍墓言龍自西來復翻轉向西也好事者浪傳爲吞人墓惑矣墓前三面環拱高巔如平地